

# Dem günstigen Leser.

**S**eil man gespürt/vnd in der That befunden hat/günstiger Leser/dß die vorige Acht Schiffarten/so von Herrn Leuino Hulsio seligen/auf der Niederländischen vnd andern Spraachen seynd verdolmetschet vnd zusammen bracht/dit wolgefallen/hat man geacht/dß dir auch damit würde bedient seyn/wann dieselbe Schiffarten hinfürö continuirt vnd verfolget würden Derhalben hastu hiemit ermeldter Schiffarten Continuation,nemlich die/so von den Holl. vnd Seeländern in nechst verflossenen zwey Jahren/als Anno 1604. vad 1605. geschehen ist. Welche dir/gweiffels ohn/nicht weniger als die vorigen gefallen wirdt/in Erwegung/gedachte Holl. vnd Seeländer in derselben nicht allein/wie gemeinlich vorhin/defensiuè: sondern auch offensiue gehandelt haben/also vnd dero gestalt/dß sie etliche der Portugeser grosse vnd kleine Schiff vnd Güter/wo sie die haben können antreffen/feindlich angegriessen vnd verderbt: Ja was mehr ist/jhnen etliche ganze Insulen/darinn sie viel Jahr gewohnet/vnd Gewerb getrieben/als nemlich Amboina vnd Tidore, so die vornembsten vnder den Molucis seynd/abgetrungen/vnd mit ihrem Volk besetzt haben. Zwar die Holl. vnd Seeländer hatten jhnen anfangs nicht fürgenommen sich feindlich wieder die Portugeser zu erzeigen. Wann aber dieselben nicht leyden können/dß iemandt mehr als sie in Ost-Indien handelten/vnd auf der Ursachen die Niederländer ins gemein/wann sie dieselben erheben können/nieder gehauen/vnd deren Güter preß gemacht vnd gegeben: Sind gemeldte Holl. vnd Seeländer gezwungen worden zu Beschützung ihres Leibes vnd Guts/ auch Errettung ihrer Freunden vnd Zugethanen/den Portugesen/vnd derselben Anhängern/mit gewalt/als iren abgesagten Feinden/ auch offensiue zu begegnen. Jedoch weil hernachmals weitläufiger hier von gehandelt wird/wil ich dieses Orts dich damit nicht auffhalten/sondern zu folgender Relation vnd Beschreibung gewiesen haben. Schab dich wol.

Gründ-